

無量壽經優波提舍 講表

婆藪槃豆菩薩造

元魏天竺三藏菩提流支譯

【壹】前言

甲一、釋名 二

乙一、經題

無量壽

無量壽是安樂淨土如來別號。釋迦牟尼佛在王舍城及舍衛國，於大眾之中說無量壽佛莊嚴功德，即以佛名號爲經體。

經

經者「常」也。言安樂國土佛及菩薩清淨莊嚴功德，國土清淨莊嚴功德，能與眾生作大饒益，可常行于世，故名曰經。

優波提舍

佛所說十二部經中有論議經，名優婆提舍。若復佛諸弟子解佛經教，與佛義相應者，佛亦許名優婆提舍，以入佛法相故。

願生

「願」是欲樂義。「生」者，天親菩薩願生彼安樂淨土，如來淨華中生，故曰願生。

偈

偈是句數義，以五言句略誦佛經，故名爲偈。

乙二、人題


造論者

婆藪槃頭菩薩

譯論者

元魏天竺三藏菩提流支

甲二、大意



甲三、判教

謹案龍樹菩薩《十住毘婆沙》云：菩薩求阿毘跋致有二種道：一者難行道，二者易行道。難行道者，謂於五濁之世，於無佛時求阿毘跋致，為難。

此難乃有多途，粗言五三以示義意：

一者、外道相善，亂菩薩法。
二者、聲聞自利，障大慈悲。
三者、無賴惡人，破他勝德。
四者、顛倒善果，能壞梵行。
五者、唯是自力，無他力持。

如斯等事，觸目皆是。譬如陸路步行則苦。

易行道者。謂但以信佛因緣，願生淨土，乘佛願力，便得往生彼清淨土。佛力住持，即入大乘正定之聚，正定即是阿毘跋致，譬如水路乘船則樂。

此《無量壽經優婆提舍》蓋上衍之極致，不退之風航者也。

【貳】正文

甲一 總說分 三

無量壽經優波提舍願生偈

乙一 歸敬儀

世尊我一心

歸命盡十方

無礙光如來

願生安樂國

何所依

我依修多羅

何故依

真實功德相

云何依

說願偈總持

與佛教相應

乙二 觀察門 三

丙一 觀察國土功德莊嚴

一 清淨功德成就

觀彼世界相

勝過三界道

二 量功德成就

究竟如虛空

廣大無邊際

三 性功德成就

正道大慈悲

出世善根生

四 形相功德成就

淨光明滿足

如鏡日月輪

五 種種事功德成就

備諸珍寶性

具足妙莊嚴

六 妙色功德成就

無垢光焰熾

明淨曜世間

七 觸功德成就

寶性功德草

柔軟左右旋

觸者生勝樂

過迦旃鄰陀

八 莊嚴功德成就

寶華千萬種

彌覆池流泉

微風動華葉

交錯光亂轉

莊嚴地

宮殿諸樓閣

觀十方無礙

雜樹異光色

寶欄遍圍繞

莊嚴虛空

無量寶交絡

羅網遍虛空

種種鈴發響

宣吐妙法音

九 雨功德成就

雨華衣莊嚴

無量香普熏

十 光明功德成就

佛慧明淨日

除世癡闇冥

十一 聲功德成就

梵聲悟深遠

微妙聞十方

十二 主功德成就

正覺阿彌陀

法王善住持

十三 眷屬功德成就

如來淨華眾

正覺華化生

十四 受用功德成就

愛樂佛法味

禪三昧為食

十五 無諸難功德成就

永離身心惱

受樂常無間

十六 大義門功德成就

大乘善根界

等無譏嫌名

女人及根缺

二乘種不生

十七 一切所求功德成就

眾生所願樂

一切能滿足

故我願往生

阿彌陀佛國

丙二 觀察阿彌陀佛功德莊嚴

一 座莊嚴

無量大寶王

微妙淨花臺

二 身莊嚴

相好光一尋

色像超群生

三 口莊嚴

如來微妙聲

梵響聞十方

四 心莊嚴

同地水火風

虛空無分別

五 眾莊嚴

天人不動眾

清淨智海生

六 上首莊嚴

如須彌山王

勝妙無過者

七 主莊嚴

天人丈夫眾

恭敬繞瞻仰

八 不虛作住持莊嚴

觀佛本願力

遇無空過者

能令速滿足

功德大寶海

丙三 觀察彼諸菩薩功德莊嚴

一 不動應化德

安樂國清淨

常轉無垢輪

化佛菩薩日

如須彌住持

二 同時遍至德

無垢莊嚴光

一念及一時

普照諸佛會

利益諸群生

三 平等供讚德

雨天樂花衣

妙香等供養

讚佛諸功德

無有分別心

四 遍示三寶德

何等世界無

佛法功德寶

我皆願往生

示佛法如佛

乙三 迴向門

我作論說偈

願見彌陀佛

普共諸眾生

往生安樂國

無量壽修多羅章句。我以偈總說竟。

甲二 解義分⁺

乙一 願偈大意

論曰：此願偈明何義？觀安樂世界，見阿彌陀佛，願生彼國土故。

乙二 起觀生信^二

丙一 示五念力

云何觀？云何生信心？若善男子善女人，修五念門成就者，畢竟得生安樂國土，見彼阿彌陀佛。

丙二 出五念門

何等五念門？一者禮拜門、二者讚歎門、三者作願門、四者觀察門、五者迴向門。

云何禮拜？身業禮拜阿彌陀如來、應、正遍知，爲生彼國意故。

云何讚歎？口業讚歎，稱彼如來名。如彼如來光明智相，如彼名義，欲如實修行相應故。

云何作願？心常作願，一心專念，畢竟往生安樂國土，欲如實修行奢摩他故。

云何觀察？智慧觀察，正念觀彼，欲如實修行毘婆舍那故。

彼觀察有三種：何等三種？一者觀察彼佛國土功德莊嚴，二者觀察阿彌陀佛功德莊嚴，三者觀察彼諸菩薩功德莊嚴。

云何迴向？不捨一切苦惱眾生，心常作願，迴向爲首，成就大悲心故。

乙三 觀行體相^二

丙一 器體^三

丁一 國土體相

云何觀察彼佛國土功德莊嚴？彼佛國土功德莊嚴者，成就不可思議力故。如彼摩尼如意寶性，相似相對法故。

觀察彼佛國土功德莊嚴者，有十七種事應知。何者十七？一者清淨功德成就、二者量功德成就、三者性功德成就、四者形相功德成就、五者種種事功德成就、六

者妙色功德成就、七者觸功德成就、八者莊嚴功德成就、九者雨功德成就、十者光明功德成就、十一者聲功德成就、十二者主功德成就、十三者眷屬功德成就、十四者受用功德成就、十五者無諸難功德成就、十六者大義門功德成就、十七者一切所求功德成就。

清淨功德成就者，偈言：觀彼世界相 勝過三界道故。

量功德成就者，偈言：究竟如虛空 廣大無邊際故。

性功德成就者，偈言：正道大慈悲 出世善根生故。

形相功德成就者，偈言：淨光明滿足 如鏡日月輪故。

種種事功德成就者，偈言：備諸珍寶性 具足妙莊嚴故。

妙色功德成就者，偈言：無垢光焰熾 明淨曜世間故。

觸功德成就者，偈言：寶性功德草 柔軟左右旋 觸者生勝樂 過迦旃鄰陀故。

莊嚴功德成就者，有三種應知。何等三？一者水、二者地、三者虛空。

莊嚴水者，偈言：寶華千萬種 彌覆池流泉 微風動華葉 交錯光亂轉故。

莊嚴地者，偈言：宮殿諸樓閣 觀十方無礙 雜樹異光色 寶欄遍圍繞故。

莊嚴虛空者，偈言：無量寶交絡 羅網遍虛空 種種鈴發響 宣吐妙法音故。

雨功德成就者，偈言：雨華衣莊嚴 無量香普熏故。

光明功德成就者，偈言：佛慧明淨日 除世癡闇冥故。

妙聲功德成就者，偈言：梵聲悟深遠 微妙聞十方故。

主功德成就者，偈言：正覺阿彌陀 法王善住持故。

眷屬功德成就者，偈言：如來淨華眾 正覺華化生故。

受用功德成就者，偈言：愛樂佛法味 禪三昧爲食故。

無諸難功德成就者，偈言：永離身心惱 受樂常無間故。

大義門功德成就者，偈言：大乘善根界 等無譏嫌名 女人及根缺 二乘種不生故。

淨土果報，離二種譏嫌過應知：一者體、二者名。

體有三種：一者二乘人、二者女人、三者諸根不具人，無此三過故，名離「體譏嫌」。

名亦三種，非但無三體，乃至不聞二乘、女人、諸根不具三種名故，名離「名譏嫌」。「等」者，平等一相故。

一切所求功德滿足成就者，偈言：眾生所願樂 一切能滿足故。

丁二 示現自利利他

略說彼阿彌陀佛國土莊嚴，十七種功德，示現如來自身利益大功德力成就，利益

他功德成就故。

丁三 入第一義諦

彼無量壽佛土莊嚴，第一義諦妙境界，十六句及一句次第說，應知。

丙二 眾生體

丁一 觀佛

云何觀佛功德莊嚴成就？觀佛功德莊嚴成就者，有八種應知。何等八種？一者座莊嚴、二者身莊嚴、三者口莊嚴、四者心莊嚴、五者眾莊嚴、六者上首莊嚴、七者主莊嚴、八者不虛作住持莊嚴。

何者座莊嚴？偈言：無量大寶王 微妙淨華臺故。

何者身莊嚴？偈言：相好光一尋 色像超群生故。

何者口莊嚴？偈言：如來微妙聲 梵響聞十方故。

何者心莊嚴？偈言：同地水火風 虛空無分別故。

無分別者，無分別心故。

何者眾莊嚴？偈言：天人不動眾 清淨智海生故。

何者上首莊嚴？偈言：如須彌山王 勝妙無過者故。

何者主莊嚴？偈言：天人丈夫眾 恭敬繞瞻仰故。

何者不虛作住持莊嚴？偈言：觀佛本願力 遇無空過者 能令速滿足 功德大寶海故。

即見彼佛，未證淨心菩薩，畢竟得平等法身，與淨心菩薩無異。淨心菩薩，與上地諸菩薩，畢竟同得寂滅平等故。

略說八句，示現如來自利利他功德莊嚴，次第成就應知。

丁二 觀菩薩

云何觀菩薩功德莊嚴成就？觀菩薩功德莊嚴成就者，觀彼菩薩有四種正修行功德成就，應知。

何等爲四？一者、於一佛土，身不動搖，而遍十方，種種應化，如實修行，常作佛事。

偈言：安樂國清淨 常轉無垢輪 化佛菩薩日 如須彌住持故。
開諸眾生淤泥華故。

二者、彼應化身一切時不前不後，一心一念，放大光明，悉能遍至十方世界，教化眾生。種種方便，修行所作，滅除一切眾生苦故。
偈言：無垢莊嚴光 一念及一時 普照諸佛會 利益諸群生故。

三者、彼於一切世界，無餘照諸佛會大眾，無餘廣大無量供養、恭敬、讚歎諸佛

如來。

偈言：雨天樂華衣 妙香等供養 讚佛諸功德 無有分別心故。

四者、彼於十方一切世界無三寶處，住持莊嚴佛法僧寶功德大海，遍示令解，如實修行。

偈言：何等世界無 佛法功德寶 我皆願往生 示佛法如佛故。

乙四 淨入願心

又向說佛國土功德莊嚴成就、佛功德莊嚴成就、菩薩功德成就，此三種成就願心莊嚴，應知。

略說入一法句故。一法句者，謂清淨句。清淨句者，謂真實智慧無爲法身故。

此清淨有二種應知。何等二種？一者器世間清淨、二者眾生世間清淨。

器世間清淨者：向說十七種佛國土功德莊嚴成就，是名器世間清淨。

眾生世間清淨者，如向說八種佛功德莊嚴成就，四種菩薩功德莊嚴成就，是名眾生世間清淨。

如是一法句，攝二種清淨，應知。

乙五 善巧攝化

如是菩薩奢摩他、毘婆舍那廣略修行，成就柔軟心。如實知廣略諸法，如是成就巧方便迴向。

何者菩薩巧方便迴向？菩薩巧方便迴向者，謂說禮拜等五種修行，所集一切功德善根，不求自身住持之樂，欲拔一切眾生苦故。作願攝取一切眾生，共同生彼安樂佛國，是名菩薩巧方便迴向成就。

乙六 離菩提障

菩薩如是善知迴向成就，遠離三種菩提門相違法，何等三種？

一者、依智慧門，不求自樂，遠離我心貪著自身故。

二者、依慈悲門，拔一切眾生苦，遠離無安眾生心故。

三者、依方便門，憐愍一切眾生心，遠離供養恭敬自身心故。

是名遠離三種菩提門相違法故。

乙七 順菩提門

菩薩遠離如是三種菩提門相違法，得三種隨順菩提門法滿足故，何等三種？

一者、無染清淨心，不以爲自身求諸樂故。

二者、安清淨心，以拔一切眾生苦故。

三者、樂清淨心，以令一切眾生得大菩提故，以攝取眾生，生彼國土故。

是名三種隨順菩提門法滿足，應知。

乙八 名義攝對

向說智慧、慈悲、方便三種門攝取般若，般若攝取方便，應知。

向說遠離我心，不貪著自身、遠離無安眾生心、遠離供養恭敬自身心，此三種法遠離障菩提心，應知。

向說無染清淨心、安清淨心、樂清淨心，此三種心略一處，成就妙樂勝真心，應知。

乙九 願事成就

如是菩薩智慧心、方便心、無障心、勝真心，能生清淨佛國土，應知。

是名菩薩摩訶薩隨順五種法門所作，隨意自在成就。如向所說身業、口業、意業、智業、方便智業、隨順法門故。

乙十 利行滿足

復有五種門，漸次成就五種功德，應知。何者五門？一者近門、二者大會眾門、三者宅門、四者屋門、五者園林遊戲地門。

此五種門，初四種門，成就入功德，第五門成就出功德。

入第一門者：以禮拜阿彌陀佛，爲生彼國故，得生安樂世界，是名入第一門。

入第二門者：以讚歎阿彌陀佛，隨順名義稱如來名，依如來光明想修行故，得入大會衆數。是名入第二門。

入第三門者：以一心專念，作願生彼，修奢摩他寂靜三昧行故，得入蓮華藏世界，是名入第三門。

入第四門者：以專念觀察彼妙莊嚴，修毘婆舍那故。得到彼處，受用種種法味樂，是名入第四門。

出第五門：以大慈悲觀察一切苦惱衆生，示應化身迴入生死園、煩惱林中。遊戲神通，至教化地，以本願力迴向故，是名出第五門。

菩薩入四種門，自利行成就，應知。菩薩出第五門，利益他迴向行成就，應知。

菩薩如是修五門行，自利利他，速得成就阿耨多羅三藐三菩提故。